

**Ataatsimiinnerup ammarneqarnera**

(Inatsisartut siulittaasuat)

Assut nuannaarutigaara Inatsisartunut ilaasortaqaqatit 2015-imi Ukiakkut Ataatsimiinnermut matumunnga tikilluaqqusinnaagassi.

Neriuppunga aasarsiorluarsimassasusi.

Ataatsimiinnermi oqaluuserisassat pingaarutillippassuit oqaluuserisussaavagut, neriutigaaralu pitsaasumik, inerititaqarfiusumik minnerunngitsumillu siunnerfilimmik suleqatigiinnikkut taakku angusaqarfiulluurtumik oqaluuseriumaarivut.

Naalackersuisut inatsisiliortullu suleqatigiilluarnissaannik kissaateqarlunga taamatutaaq Naalackersuisunut ilaasortat qamannga pisumik tikilluaqquakka.

Sineriassuatsinni isorartoqisumi nunaqqativut tamaasa TV-kkut, radiukkut inatsisartullu nitartagaatigut Inatsisartut ataatsimiinnerannik malinnaasut pinngitsoorusunngilanga aamma tikilluaqqussallugit.

Takusinnaavara Inatsisartunut ilaasortat tamarluinnangajammik ataatsimiinnerup ammarneqarneranut apuussimasut. Justus Hansen New Yorkimiippoq Naalagaaffiit Peqatigiit ataatsimeersuarnerannut peqataalluni.

Naaja Nathanielsen aamma Tillie Martinussen ullumikkut pissutissaqarlutik najuutinngillat.

Ilisimatitsissutigisinnaavarattaaq Inatsisartut sinnerlugit Ataqqinartorsuaq Dronning Margrethe Aappaat, danskit naalackersuisui, Folketingi, Islandimi Altingi Savalimmiunilu Lagtingi Nunavummilu inatsisartut Inatsisartut ukiuanni nutaami pitsaasumik suleqatigiittuarnissamik kissaateqarlunga inuulluaqqussuteqarfigisimagakkit.

Kiisalu nalunaarutigissavara Inatsisartunut ilaasortaq Siverth K. Heilmann, napparsimalluni nalunaarsimammat taamaattumillu Atassut Siulittaasoqarfimmut qinnuteqarsimalluni Siverth K. Heilmannip suleqqilersinnaanissaata tungaanut sinniisussamik ataatsimiigiqquusisoqarnissaanik. Siulittaasoqarfiup tamanna akueraa Paninguaq M. Kruselu sinniisussatut ataatsimiigiqquusimallugu.

Qinigaanerup Misilinneqarnissaanut Ataatsimiititaliap Paninguaq M. Krusep qinigaasinnaanera akuersissutigisimavaa.

Siverth K. Heilmannimut sinniisussatut Paninguaq M. Krusep Inatsisartut ataatsimiinneranni peqataanissaa Inatsisartut akuersissutigissagaat matumuuna inassutigaara.

Akerliusoqarnerluni .....

Paninguaq M. Kruse tikilluarit, Inatsisartuni inissannut ingissinnaavutit.

Taamatuttaa Inatsisartut ilaasortaq Aaja Chemntz Larsen, Inuit Ataqtigiit, sulingiffeqarnissaminik qinnuteqarpoq.

Múte B. Egedep sinniisussatut ataatsimiigiqqueneqarnissaa Inuit Ataqtigiit qinnutigaat.

Qinigaanerup Misilinneqarnissaanut Ataatsimiititaliap Múte B. Egedep qinigaasinnaanera akuersissutigisimavaa.

Aaja Chemnitz Larsenimut sinniisussatut Múte B. Egedep Inatsisartut ataatsimiinneranni peqataanissaa Inatsisartut akuersissutigissagaat matumuuna inassutigaara.

Akerliusoqarnerluni .....

Múte B. Egede tikilluarit, Inatsisartuni inissannut ingissinnaavutit.

Taamatut oqaaseqarlunga Inatsisartut 2015-imi Ukiakkut Ataatsimiinneq ammarneqartutut nalunaarutigaa.